

21 SEP 1999

Agong-Pertabalan

YANG DI-PERTUAN AGONG KE 11 DITABAL KHAMIS INI

KUALA LUMPUR, 21 Sept (Bernama) -- Pertabalan Yang di-Pertuan Agong ke-11 Sultan Salahuddin Abdul Aziz Shah Alhaj Almarhum Sultan Hishamuddin Alam Shah Alhaj akan berlangsung penuh istiadat Khamis ini.

Istiadat yang diadakan di Balairong Seri, Istana Negara itu akan disaksikan oleh raja-raja Melayu serta Yang Dipertua Negeri.

Yang akan turut berangkat ialah Putera Mahkota Brunei Darussalam mewakili Sultan Brunei, kata Menteri di Jabatan Perdana Menteri Datuk Tajol Rosli Ghazali yang juga Pengerusi Jawatankuasa Pusat Pertabalan.

Perdana Menteri Datuk Seri Dr Mahathir Mohamad, menteri-menteri kabinet dan wakil-wakil negara asing juga akan menghadiri istiadat itu.

Sultan Salahuddin, 74, yang dipilih sebagai Yang di-Pertuan Agong pada 26 April lepas oleh raja-Raja Melayu, menggantikan Tuanku Ja'afar ibni Almarhum Tuanku Abdul Rahman yang tamat tempoh pemerintahan pada 25 April.

"Upacara pertabalan Sultan Salahuddin akan berlangsung dalam suasana gilang gemilang dengan iringan nobat, yang menjadi ciri utama dalam mana-mana istiadat pertabalan Raja-raja Melayu zaman berzaman," kata Tajol Rosli.

Istiadat akan bermula dengan pemeriksaan kawalan kehormatan oleh Seri Paduka.

Yang di-Pertuan Agong dan Raja Permaisuri Agong Tuanku Siti Aishah kemudiannya akan berangkat masuk ke Balairong Seri dan bersemayam di singgahsana.

Tajol Rosli berkata pada istiadat pertabalan itu, keris kerajaan akan dipersembahkan kepada Yang di-Pertuan Agong sebelum Seri Paduka akan melafazkan ikrar jawatan.

Laungan Daulat Tuanku dan tembakan meriam 21 das akan menandakan pertabalan disempurnakan.

Upacara pertabalan bersejarah itu akan disiarkan secara langsung oleh TV1.

Tajol rosli berkata Yang di-Pertuan Agong dan Raja Permaisuri akan menghadiri beberapa majlis sempena sambutan pertabalan selama lima hari.

Pada sebelah petang hari pertabalan, Seri Paduka akan berangkat merasmikan pameran "Raja Kita" di Muzium Negara sebelum menghadiri majlis tahlil dan doa selamat di Masjid Negara.

Pada hari Jumaat, Seri Paduka berdua akan menghadiri jamuan teh meraikan kanak-kanak di The Mines dan majlis jamuan diraja di Istana Negara pada sebelah malam.

Khutbah khas sembahyang Jumaat juga akan diadakan di masjid seluruh negara.

Pada hari berikutnya Tuanku Siti Aishah akan berangkat melawat Institut Pediatrik Hospital Kuala Lumpur.

Program Bersama Rakyat akan berlangsung di Dataran Merdeka.

Seri Paduka berdua juga akan berangkat ke majlis persembahan teater muzikal di Panggung Negara, Isnin ini.

-- BERNAMA

NHD MAI